



## AFERA SNIMAK | Ne smiruje se bura u vezi s reportažom italijanskog novinara **SIPA uhapsila Hamidovića za kojim traga Interpol Italije**

Za Hamidovićem bila raspisana potraga zbog organiziranog kriminala i trgovine drogom. Novinar Luigi Pelazza u nedjelju objavio nastavak priče o slučaju iz BiH, te demantirao da je platio dvojici sitnih kriminalaca da glume trgovce oružjem u njegovom prilogu

**P**rovodeći dalju istragu vezanu za snimak italijanskog novinara Luigija Pelazze, pripadnici Državne agencije za istrage i zaštitu (SIPA) u četvrtak su identificirali i uhapsili još jednu osobu.

### Skrivena kamera

Provjerama je utvrđeno da je za navedenom osobom raspisana crvena međunarodna potjernica po zahtjevu nadležnih organa Italije.

Nakon kriminalističke obrade u prostorijama SIPA-e, osumnjičeni je predat Sudu BiH na dalje postupanje.

Kako nezvanično saznajemo, riječ je o D. Hamidoviću, za kojim je Italija raspisala potragu zbog organiziranog kriminala i trgovine drogom. U Sudu BiH jučer je održano ročište o određivanju ekstradiციjskog pritvora.

Italijanski novinar Luigi

Pelazza, podsjećamo, u nedjelju je u emisiji „Le lene“ objavio nastavak priče o slučaju iz BiH.

On je demantirao tvrdnje Tužilaštva BiH da je platio dvojici sitnih kriminalaca da glume u njegovom prilogu, te prikazao još više snimljenog materijala napravljenog skrivenom kamerom.

Tužilaštvo Bosne i Hercegovine je nakon hapšenja i ispitivanja ove dvojice, saopćilo da se „ne radi o trgovcima oružjem, nego o osobama kojima je novinar za potrebe priloga dao novac da glume u fingiranoj TV sceni“.

Jarčevićev advokat Omar Mehmedbašić nam je, nakon što je njegov klijent pušten na slobodu, kazao da je „on, nažalost, ovisnik o narkoticima, koji je s kolegom pokušavao da se snađe za novac, te ga je novinar zloupotrijebio za snimak“.

Iz svega se nameće jedini logičan zaključak da su ustvari


Jarčević i Sejdić, u nastojanju da na prevaru dođu do brze zarade, novinara doveli u zabludu da mu mogu „završiti“ neko oružje.

### Džeparoši sa Gorice

On je, s druge strane, njihovo prazno hvalisanje iskoristio za svoj tendenciozni prilog pod nazivom „Gdje ISIL nabavlja oružje za napade u EU“.

Ono što je manje poznato jeste da Davora Jarčevića u Sarajevu malo ko poznaje pod tim imenom. On se, naime, predstavlja kao Mahir Sejdić, a čitaoci Faktora prepoznali su ga kao sitnog kriminalca s Gorice, koji predvodi ekipu džeparoša i lopova, među kojima su i dobro poznati Jasmin Tahirović i Valerio Osmanović.

Ova grupa, između ostalog, svakodnevnim pljačkama na ulici već mjesecima zadaje glavobolju stanovnicima općina Centar i Stari Grad. M. M.



Inspektori **SIPA-e** nedavno pretresali i hapsili na Gorici